

# Канон Ангелу Хранителю

Моли́твами святы́х оте́ц на́ших, Го́споди Иису́се Христе́ Бо́же наш, поми́луй нас. Ами́нь.

Трисвятое. Пресвята́я Трои́це: Слава, и ныне: Отче наш: Го́споди, поми́луй. (12 раз.) Слава, и ныне: Приидите, поклонимся (Трижды.)<sup>1</sup>  
Псалом 50.

## КАНОН, глас 8-й

### *Песнь 1*

*Ирмос:* Пои́м Го́сподеви, проведшему лю́ди Сво́я сквозе́ Чермное́ мо́ре, я́ко еди́н сла́вно просла́вился.

*Иисусу:* Го́споди Иису́се Христе́ Бо́же мой, поми́луй мя<sup>2</sup>.

Песнь воспéти и восхвалíti, Спа́се, Твоего́ раба́ досто́йно сподо́би, безплóтному Ангелу, наста́внику и хранителю́ моему́.

*Припев:* Святы́й Ангеле́ Бо́жий, хранителю́ мой, моли́ Бо́га о мне.

Еди́н аз в неразу́мии и в ле́ности ны́не лежу́, наста́вниче мой и хранителю́, не оста́ви мене́, погиба́юща.

Слава: Ум мой твоёю моли́твою напра́ви, твори́ти ми Бо́жия повелéния, да получу́ от Бо́га отда́ние грехо́в, и ненави́дети ми злых наста́ви мя, молю́ся ти.

И ныне: Моли́ся, Деви́це, о мне, рабе́ Твоём, ко Благодателю́, со хранителем мо́им Ангелом, и наста́ви мя твори́ти за́поведи Сы́на Твоего́ и Творца́ моего́.

### *Песнь 3*

*Ирмос:* Ты еси́ утвержде́ние притека́ющих к Тебе́, Го́споди, Ты еси́ свет омраче́нных, и поёт Тя дух мой.

Святы́й Ангеле́ Божий, хранителю́ мой, моли́ Бога о мне.

Все помышле́ние моё и ду́шу мою́ к тебе́ возложих, хранителю́ мой; ты от вся́кия мя напа́сти вра́жия изба́ви.

Святы́й Ангеле́ Божий, хранителю́ мой, моли́ Бога о мне.

Враг попира́ет мя, и озлобляет, и поучает всегда́ твори́ти сво́я хотéния; но ты, наста́вниче мой, не оста́ви мене́ погиба́юща.

Слава: Пéти песнь со благодарéнием и усéрдием Творцу́ и Бо́гу даждь ми, и тебе́, благому́ Ангелу́ хранителю́ моему́: изба́вителю́ мой, изми́ мя от враг озлобля́ющих мя.

---

<sup>1</sup> Полный текст этих молитв см. в разделе «Молитвы утренние»

<sup>2</sup> Тропарь Иисусу Христу – только в первой и девятой песнях канона.

И ныне: Исцели, Пречистая, моя многонедужная струпа, яже в души, прожени враги, иже присно борются со мною.

Господи, помилуй. (Трижды.)

### *Седален, глас 2-й*

От любви душевныя вопию ти, хранителю моея души, всесвятый мой Ангеле: покрый мя и соблюди от лукаваго ловления всегда, и к жизни настави небесней, вразумляя и просвещая и укрепляя мя.

Слава, и ныне: *Богородичен:*

Богородице безвестная Пречистая, Яже без семени рождши всех Владыку, Того со Ангелом хранителем моим моли, избавити ми ся всякаго недоумения, и дати умиление и свет души моей и согрешением очищение, Яже едина вскоре заступающи.

### *Песнь 4*

*Ирмос:* Услышах, Господи, смотрения Твоего таинство, разумех дела Твоя, и прославих Твое Божество.

Святый Ангеле Божий, хранителю мой, моли Бога о мне.

Моли Человеколюбца Бога ты, хранителю мой, и не остави мене, но присно в мире житие мое соблюди и подаждь ми спасение необоримое.

Святый Ангеле Божий, хранителю мой, моли Бога о мне.

Яко заступника и хранителя животу моему прием ты от Бога, Ангеле, молю ты, святый, от всяких мя бед свободи.

Слава: Мою скверность твоею святынею очисти, хранителю мой, и от части шуйя да отлучен буду молитвами твоими и причастник славы явлюся.

И ныне: Недоумение предлежит ми от обышедших мя зол, Пречистая, но избави мя от них скоро: к Тебе бо единой прибегах.

### *Песнь 5*

*Ирмос:* Утренююще вопием Ти: Господи, спаси ны; Ты бо еси Бог наш, разве Тебе иного не вемы.

Святый Ангеле Божий, хранителю мой, моли Бога о мне.

Яко имея дерзновение к Богу, хранителю мой святый, Сего умоли от оскорбляющих мя зол избавити.

Святый Ангеле Божий, хранителю мой, моли Бога о мне.

Свете светлый, светло просвети душу мою, наставниче мой и хранителю, от Бога данный ми Ангеле.

Слава: Спяща мя зле тяготою греховною, яко бдяща сохрани, Ангеле Божий, и возстави мя на славословие молением твоим.

И ныне: Марие, Госпоже Богородице безвестная, надеждо верных, вражия возношения низложи, поющия же Тя возвесели.

## *Песнь 6*

*Ирмос:* Ризу ми подаждь светлу, одейся светом яко ризою, многомилостиве Христе Боже наш.

Святыи Ангеле Божий, хранителю мой, моли Бога о мне.

Всяких мя напастей свободи, и от печалей спаси, молюся ти, святыи Ангеле, данный ми от Бога, хранителю мой добрый.

Святыи Ангеле Божий, хранителю мой, моли Бога о мне.

Освети ум мой, блаже, и просвети мя, молюся ти, святыи Ангеле, и мыслити ми полезная всегда настави мя.

*Слава:* Устави сердце мое от настоящего мятежа, и бдети укрепи мя во благих, хранителю мой, и настави мя чудно к тишине животней.

И ныне: Слово Божие в Тя вселися, Богородице, и человеком Тя показав небесную лестницу; Тобою бо к нам Вышний сошел есть.

Господи, помилуй. (*Трижды.*) Слава, и ныне:

### *Кондак, глас 4-й*

Явися мне милосерд, святыи Ангеле Господень, хранителю мой, и не отлучайся от мене, сквернаго, но просвети мя светом неприкосновенным и сотвори мя достойна Царствия Небеснаго.

### *Икос*

Уничженную душу мою многими соблазны, ты, святыи предстателю, неизреченныя славы небесныя сподоби, и певец с лики безплотных сил Божиих, помилуй мя и сохрани, и помыслы добрыми душу мою просвети, да твоею славою, Ангеле мой, обогащуся, и низложу зломыслящих мне враги, и сотвори мя достойна Царствия Небеснаго.

## *Песнь 7*

*Ирмос:* От Иудеи дошедше отроцы, в Вавилоне иногда, верою Троицкою пламень пещный попраша, поюще: отцев Боже, благословен еси.

Святыи Ангеле Божий, хранителю мой, моли Бога о мне.

Милостив буди ми, и умоли Бога, Господень Ангеле, имею бо тя заступника во всем животе моем, наставника же и хранителя, от Бога дарованнаго ми во веки.

Святыи Ангеле Божий, хранителю мой, моли Бога о мне.

Не остави в путь шествующия души моея окаянныя убити разбойником, святыи Ангеле, яже ти от Бога предана бысть непорочне; но настави ю на путь покаяния.

*Слава:* Всю посрамлену душу мою привожу от лукавых ми помысл и дел: но предвари, наставниче мой, и исцеление ми

подаждь благих помысл, уклоняти ми ся всегда на правыя стези.

И ныне: Премудрости исполни всех и крепости Божественныя, Ипостасная Премудросте Вышняго, Богородицы ради, вероу вопиющих: отец наших Боже, благословен еси.

### *Песнь 8*

*Ирмос:* Царя Небеснаго, Егоже поют вси ангельстии, хвалите и превозносите во вся веки.

Святой Ангеле Божий, хранителю мой, моли Бога о мне.

От Бога посланный, утверди живот мой, раба твоего, преблагий Ангеле, и не остави мене во веки.

Святой Ангеле Божий, хранителю мой, моли Бога о мне.

Ангела ты суща блага, души моея наставника и хранителя, преблаженне, воспеваю во веки.

Слава: Буди ми покров и забрало в день испытанія всех человек, вонже огнем искушаются дела благая же и злая.

И ныне: Буди ми помощница и тишина, Богородице Приснодево, рабу Твоему, и не остави мене лишена быти Твоего владычества.

### *Песнь 9*

*Ирмос:* Воистинну Богородицу Тя исповедуем, спасеннии Тобою, Дево чистая, с безплотными лики Тя величающе.

*Иисусу:* Господи Иисусе Христе Боже мой, помилуй мя.

Помилуй мя, единое Спасе мой, яко милостив еси и милосерд, и праведных ликом сотвори мя причастника.

Святой Ангеле Божий, хранителю мой, моли Бога о мне.

Мыслити ми присно и творити, Господень Ангеле, благая и полезная даруй, яко сильна яви в немощи и непорочна.

Слава: Яко имея дерзновение к Царю Небесному, Того моли, с прочими безплотными, помилovati мя, окаяннаго.

И ныне: Много дерзновение имущи, Дево, к Воплощшемуся из Тебе, преложи мя от уз и разрешение ми подаждь и спасение, молитвами Твоими.

### *Молитва к Ангелу Хранителю*

Ангеле Христов святей, к тебе припадая молюся, хранителю мой святей, приданный мне на соблюдение души и телу моему грешному от святого крещения, аз же своею леностию и своим злым обычаем прогневах твою пречистую светлость и отгнах тя от себе всеми студными делы: лжами, клеветами, завистию, осуждением, презорством, непокорством, братоненавидением, и злопомнением, сребролюбием, прелюбодеянием, яростию, скупостию, объядением без сытости и опивством, многоглаголанием, злыми помысли и лукавыми, гордым обычаем и блудным

возбешением, имый самохотение на всякое плотское вожделение. О, злое мое произволение, егоже и скоти безсловеснии не творят! Да како возможешι възрети на мя, или приступити ко мне, аки псу смердящему? Которыма очима, Ангеле Христов, възриши на мя, оплетшася зле во гнусных делех? Да како уже возмогу отпущения просити горьким и злым моим и лукавым деянием, в няже впадаю по вся дни и нощи и на всяк час? Но молюся ти припадая, хранителю мой святыи, умилосердися на мя грешнаго и недостойнаго раба твоего (*имя*), буди ми помощник и заступник на злаго моего сопротивника, святыми твоими молитвами, и Царствия Божия причастника мя сотвори со всеми святыми, всегда, и ныне и присно и во веки веков. Аминь.

Достойно есть яко воистину блажити Тя Богородицу, Присноблаженную и Пренепорочную и Матерь Бога нашего. Честнейшую Херувим и славнейшую без сравнения Серафим, без истления Бога Слова рождшую, сущую Богородицу Тя величаем. (*Поклон*)

Слава, и ныне: Господи, помилуй. (*Трижды.*) Господи, благослови.

Господи, Иисусе Христе, Сыне Божий, молитвами Пречистыя Твоея Матере, преподобных и богоносных отец наших и всех святых помилуй и спаси нас, яко Благ и Человеколюбец. Аминь.